

**Aalisarnermut aningaasaliissutitut immikkoortitat pillugit Inatsisartut inatsisaata
allangortinneqarnera pillugu Inatsisartut inatsisaat**

pillugu

Inatsisartut Aalisarnermut, Piniarnermut Nunalerinermullu Ataatsimiititaliaata

ISUMALIUTISSIISSUTAA

Siunnersuutip aappassaaneerreqarnerani saqqummiunneqartoq

Inatsisartut Aalisarnermut, Piniarnermut Nunalerinermullu Ataatsimiititaliaat
suliarinninnermini ukuninnga inuttaqarpoq:

Inatsisartunut ilaasortaq Hans Aronsen, siulittaasoq, Inuit Atagatiit

Inatsisartunut ilaasortaq Andreas Uldum, siulittaasup tullia, Demokraterne

Inatsisartunut ilaasortaq, Anders Olsen Inuit Atagatiit

Inatsisartunut ilaasortaq, Hans Enoksen, Siumut

Inatsisartunut ilaasortaq, Siverth K. Heilmann Atassut

0. Siunnersuutip siullermeerneqarnera

Aalisarnermut ataatsimiititaliap siullermeereernerup kingorna inatsisissatut siunnersuut
misissorsimavaa. Siunnersuutip siullermeernerani siunnersuutip maannatut isikkoqartillugu
piviusunngortinneqartariaqartoq Inatsisartuni isumaqatigiissutigineqartoq Ataatsimiititaliap
maluginiarpa. Siunnersuummi siunertaasut Inatsisartunit tapersorsorneqartut
Ataatsimiititaliap tusaatissat tiguaa.

1. Siunnersuutip tusarniaassutigineqarnera

Siunnersuut Aalisarnermut pillugu Siunnersuisoqatigiinnut, Inuussutissarsiornermut Naalacker-
suisoqarfimmut, Aningaasaqarnermut Nunanullu Allanut Naalackersuisoqarfimmut,
KANUKOKA-mut, Kalaallit Nunaanni Sulisitsisut Peqatigiiffianut, KNAPK-mut,
Grønlandsbanken-imut aamma Sparbank Vest Grønlandimut piffissani 2. martsimiit 5
martsimut kingumullu 8. aprilimiit 4. maj 2009 ilanngullugu marloriarluni tusarniaassutigine-
qarpoq. Malugineqassaaq siullermik tusarniaanermut piffissaliussaq sivikitsuararsuummat.
Naalackersuisut inatsisiliornermut atatillugu tusarniaaffigisat tusarniaanermut naleqquttumik
piffissaliiffigineqartarnissaat isumannaarneqassasoq Ataatsimiititaliamit
kaammattuutigineqassaaq. Tusarniaanermi akissutit misissornerini tusarniaaffigineqartut
arlallit oqaaseqaateqarsimasut Ataatsimiititaliap maluginiarpa. Tusarniaanerup nalaani

aserorterisarnermut tapiissutit qinnuteqartunut tunniunneqarnissaannut piumasagaatit suut tunngavigineqassanersut erseqqissarneqassasoq Sulisitsisunit aamma KNAPK-mit ujjartorneqarpoq. Ilaatigut inatsisissatut siunnersuummi § 1, imm. 9-p oqaasertalerneratigut Naalakkersuisut kattuffinnit kissaatigisaq tamanna tamakkiisumik naapertorneqarsimasoq Ataatsimiititaliap nalilerpaa, tamatumani aserorterinissamut tapiissutinik naatsorsuutigisaqarsinnaanermut piumasagaatit aalajangersimasut kinaassusersiunngitsullu aalajangersarneqarmata.

Naggataatigut Ataatsimiititaliap maluginiarpaa aappasaanik tusarniaanermi KNAPK siunnersuummut oqaaseqaatissaqarsimanngitsoq. Siunnersuutip oqaasertalersorneqarneranut Royal Greenland A/S oqaaseqaateqarsimanngilaq, taamaattorli siunnersuummut tamakkiisumik tapersersuinini oqaatigalugu, suliffeqarfimmi isumaqarmat inatsisissatut siunnersuummi suliniut taamaattoq oqariartuutigineqartoq pisariaqartuusooq piumasarineqartariaqartorlu. Grønlandsbanken Royal Greenland-itulli aaqqissuussinermut tamakkiisumik tapersersuivoq.

2. Siunnersuutip imarisai

Aalisariutit ilaannut raajarniutaanngitsut nutarterneqarnissaannut tapiissuteqarnissamut periarfissiinissaq Inatsisissatut siunnersuummi anguniarneqarpoq. Tulliatut sinerissami qanittumi aalisariutini angallatit aserortigassatut piukkunnarsisimasunut tapiissuteqarsinnaanermut aaqqissuussineq aamma periarfissiivoq. Tamatuma saniatigut aalisariutinut tapiissutit periarfissaasut annertusinissaannik siunnersuut imaqarpoq. Angallataatillit 20 %-inik angallatinik tapiiffigineqarlutik pissarsisimasut inatsisissatut siunnersuut akuerineqareerpat tapiissutinik suli allanik 20 %-inik qinnuteqarsinnaapput. Angallataatillit periarfissaq taanna atussallugu kissaatigisaqarunik angallatip pissarsiarineqarnerani ataatsimut akianut 10 %-iinik nammineq aningaasaliissuteqassapput. Piumasagaat taanna taamaallaat qinnuteqartunut nutaanut atuuppoq. Angallataatillit “nutaanngitsumik” taarsigassarsisimasut 10 %-inik nammineq akiliuteqarnissamut piumasagaammut ilaatinneqanngillat. Aalisarnermut atortussanik pisiniarnissamut suli allanik 20 %-inik periarfissaqarneq atuutinngilaq.

3. Ataatsimiititaliap isumaliutai

Inatsisissatut siunnersuut saqqummiunneqartoq sinerissamut qanittumi aalisarnermi pisariaqartutut isiginiarneqarpoq. Angallatit sinerissamut qanittumi angallataasut ilaat ullutsinnut naleqqutinngillat, tamatumani inuttaasut akissarsiaqartinneqarsinnaaneranumut aamma angallatip naammaginartumik pitsaassuseqarnissaanut angallataatillit matussutissanik naammattunik aningaasarsiortarnerat qularnarami. Siunnersuummi nalinginnaasumik oqaaseqaatini takuneqarsinnaasutut sinerissamut qanittumi aalisariutaasuni angallatit pillugit KANUAANA-p takussutissiatut suliarisimasaani takuneqarsinnaavoq angallatit 86-it ukiut 35-it sinnerlugit pisoqaassuseqartut. Aammattaaq angallatit arlaqaqaat ukiut 20-t sinnerlugit pisoqaassuseqartut. Taamaalilluni sillimaniarnermut, motorinut usilersorfinnullu

uninngatitsivinnut atatillugu sinerissamut qanittumi angallatit ilarpassui pisoqalilersimanerat qularutissaanngilaq. Aalisarnermut ataatsimiititaliaq naalakkersuisutulli isumaqarpoq pissutsit imaalersut nunani tamalaani aningaasarsiornikkut ajornartoorneq pissutigalugu sinerissamut qanittumi aalisarnermi angallatit nutarternissaannut taarsigassarsianik pisariaqartunik inuussutissarsiut nammineq aningaasanik pissarsisinnaanngitsoq. Taamaattumik inuussutissarsiutip maanna taarsigassarsiassanut ajornartoornerani ikiorsiinissamut iliuusissanik pisariaqartitsisoqarpoq. Angallatit pisoqalinerat aamma pitsaasuunnginnerat pissutigalugu angallatit ullutsinnut naleqqutinngitsut aserortissallugit pisariaqalersinnaasoq nassuerutigisariaqarpoq, minnerunngitsumillu sukkuulluuniit aalisarneqarsinnaasunut aalisarsinnaassutsip ataavartumik naleqqussartarnissaata pisariaqarnera pissutigalugu. Aalisarsinnaassutsip isumalluutitut tunngaviusunut naleqqussarneratigut piffissaq ungasinnerusoq eqqarsaatigalugu inuussutissarsiummi aalajaannerusumik ingerlatsinissaq piffissarlu ungasinnerusoq eqqarsaatigalugu isertitaqartarneq isumannaarneqassaaq, tamannalu aalisarneq aningaasarsiornikkut ingerlalluarnerusoq aamma imminut napatinnerusoq pissutigalugu inuiaqatigiinnut iluanaarutit amerlanerulernerannik kinguneqassaaq.

Ataatsimiititaliap maluginiarpa Grønlandsbankip tusarniaanermi akissummini Naalakkersuisunut erseqqissaatigigaa, aalisalersinneqartut amerlinerisigut annertunerusumik nakkutilliinissaq isumaliutigineqarsinnaasoq, taamaalilluni ukiuni marlunni aalisarnermik ingerlatsinissaq kingornatigullu aserorterinissamut tapiissuteqarnissamik qinnuteqarnissaq siunertaralugu angallatit pisoqqat nunani allaneersut eqqunneqarsinnaanerat pinngitsoortinneqarsinnaaniassammat. Tamanna tunuliaqutaralugu Naalakkersuisut Ataatsimiititaliamit ima aperineqassapput: Grønlandsbankip taasaa aaqqissuussinermik atornerluinissamut periarfissap atuunna pisinnaanngitsoq oqaatigineqarsinnaava, aamma taamaattoqassappat pinngitsoortinneqarnissaanut qanoq naleqqunnerpaamik iliuuseqartoqarsinnaava? Siunnersuutip aappassaaneerneqarneqarani Ataatsimiititaliap apeqqaata Naalakkersuisut akissuteqaamminni sammissagaat Ataatsimiititaliap kissaatigissavaa.

3.1 Periarfissat naggasiullu

Nunarsuarmi aningaasarsiornikkut ajornartoornermi inuussutissarsiornermut aningaasalersuisarnermut ingerlatsiviit killiliinerisa saniatigut aalisakkat assigiinngitsut akii aamma pitsaanngitsumik sunnerneqarput. Taamatuttaaq raajat imartani nillertumeersut akii sunnerneqarput. Eurofish FN-imi immikkoortup FAO-p nunarsuup immikkoortuani immikkoortuusooq nalunaaruteqarpoq raajat imartani nillertumeersut akii piumaneqarnerilu 2008-p ingerlanerani ukioq tamaat appariartorsimasut, immikkoortullu qaammammut nalunaarusiaanni erserpoq taamatut pilierartornera 2009-mi suli ingerlaannassasoq. Taamatut pilierartornerup aalisartut pisoqaanerpaanik ingerlalluannginnerpaanillu angallatinik piginnittut aningaasarsiornerisigut pitsaanngitsumik sunnersimavai. Nunarsuarmi niuffaffinni akit ilorraanut qaqugu saassanersut maannakkut siulittuutigineqarsinnaanngilaq.

Taamaattumik aalisarsinnaassutsip naleqqussarnissaanut pisariaqartitsinerup nunarsuarmi aningaasarsiernerup muminnerata qanoq sunniuteqarsinnaanera qularnaateqarpoq. Taamatuttaaq EU-p nunat pingajuinut EU-mut raajanik eqqussuisunut akitsuusiutakkap 0-nngortitsiniarlugu suliniuteqalernera ernummatigisariaqarpoq. Taamatut iliuuseqarneq ingammik Canadamut raajanik immami nillertuneersunik nioqquteqartartuusut annersaasut ilaannut iluaqutaassaaq. Nunat pingajuinit raajanik immami nillertuneersunik EU-p niuffaffimminut ammaassilluinnarniarnerata Kalaallit Nunaata avammut nioqquteqartarnera eqqortussavaa, tamannalu aalisariutit ilaannik ullumikkut imminut akilersinnaanngitsunik aserorterisarnerup pilertornerulernissaanik sunniuteqarsinnaavoq. Taamatut sinerissamut qanittumi aalisarnermi pissutsit ilungersunartut tunuliaqutaralugit Aalisarnermut ataatsimiititaliaq isumaqarpoq sinerissamut qanittumi aalisarnermi aaqqissuusasaanerme ajornartorsiutit pinarnerpaat Naalakkersuisut inatsisissatut siunnersuutigisaanit ikiorsiiffigineqarsinnaassasut.

4. Ataatsimiititaliap inassuteqaataa

Aalisarnermut, Piniarnermut Nunalerinermullu Ataatsimiititaliap **isumaqatigiittup** siunnersuut matumuuna maannakkutut isikkoqartillugu akuersissutigineqassasoq innersuussutigivaa.

Taama oqaaseqarluni Inatsisartut Aalisarnermut, Piniarnermut Nunalerinermullu Ataatsimiititaliaata siunnersuut Inatsisartunut aappassaaniigassanngortippaa.

Siulittaasoq

Siulittaasup tullia